

欽定大清會典事例

欽定大清會典事例卷九百三十二

工部

橋道 橋梁道路

橋梁道路。○都城內外大街凡十有六。坊二十有四。護城橋十有五。玉河橋十。水陸大小橋梁共三百有七十。○順治元年定。凡直省橋梁道路。令地方各官以時修理。若橋梁不堅完。道路不平坦。及水陸津要之處。應置橋梁而不置者。皆交部分別議處。○又議准。

京師街道。差本部漢司官一人專管。仍令五城司

坊官分理。凡在京內外街道。若有作踐掘成坑坎。蓋房侵占。或傍城使車。撒放牲畜。損壞城腳及

大清門前

御道正陽橋及各門月城等處作踐損壞者。交刑部治罪。○康熙二年覆准。內城街道。令滿漢御史。街道廳步軍翼尉協尉管理。外城令街道廳五城司坊官管理。○三年覆准。街道分左右翼。差本部滿漢司官各二人管理。○十四年覆准。內城街道交步軍統領。外城交街道廳分理。○

四十三年奉

旨。街道交步軍統領專管。○四十七年奉

旨。著給事中兼管街道。○五十年奉

旨。凡一應舊有瓦房偏廈侵占街道者。暫免拆毀。俟蓋

造時清出。○又議准。正陽門外東西兩邊房屋。並豬

市口民房。以新溝為限。准其修理蓋造。至小街

有溝者。以溝為限。無溝及街道原係參差不整。

或一面係空地者。均以左右鄰房不占官街者

為準。仍將該戶礙道尺寸報部備案。日後更造。

清出還官。○五十二年定。監督街道。仍差本部

滿漢司官各一人。定限一年更代。○雍正二年諭。九門石路損壞。行走維艱。交工部步軍統領公同詳勘。將應修補之處確估。以次修理。再西直門外石路。修至高梁橋。暢春園石路有損壞者。亦著修理。此工著動內庫銀。○又

諭。聞前三門外溝渠壅塞。人家存水。街道泥濘。行路艱難。如有積水之處。作何疏通。毋使居民受累。步軍統領察覈奏聞。著該城監察御史街道廳營弁會同料估。啟奏。動用內帑修理。如有騎溝大房著拆毀。賞銀以償其費。○又覆准

皇城一帶地方禁止當街汙穢曬晾皮張。○三年諭廣甯門外大路低窪大雨時行則積水處車輛行李往來甚難著步軍統領支部庫銀修理石路。○又

諭直隸總督今年六月以後雨水過多橋梁道路多被淹沒京師為四方輻輳之地士民商賈往來雲集今聞近京各處道路積滯行李維艱諸物騰貴朕心深為軫念爾可轉飭各地方官悉心籌畫其大路中積水之處作何疏洩窪圯之處作何修墊通州一路可交與通永道副將古北口一路可交與提督及該管州縣官宣府一路可交與總兵官及該管州縣官近

京一帶可交與大興宛平良鄉等縣及涿州速令相度地勢設法修理使行旅無阻不可藉端科派以便民之政轉致累民。○又

諭御史條奏道路甚高相應創挖將創出之土止住空車止裝半載出城不費錢糧等語若攔止空車趕車之人必怨怨則進城之車必少進城之車少物價必貴與民生無益現今京城禁止成造土坯此土情願取去成造土坯及填墊院基溝渠者聽其取用餘土亦著動正項錢糧豈可勞衆。○又

諭新修九門石路有被重車壓陷者著即修理嗣後日

久再有車壓塌陷處。步軍統領由部支領錢糧修理。

○又議准

紫禁城周圍玉河街道。有堆積處。悉行禁止。嗣後仍令步軍統領清理。並於左右兩翼內。委所屬官弁不時巡查。○四年奏准。通州牛欄山昌平州道路。交地方官查看。遇有低窪。隨時修整。○六年奏准。京倉運道。一概修整石路。工竣令保固三年。○又奏准。查勘石路。自廣甯門外至小井。邨土道。自右安門外至草橋南。並夾石路之護。土木釘荆笆。悉令平坦堅固。工竣保固三年。

○七年

諭正陽門外天橋至永定門一路甚是低窪。此乃人馬往來通衢。若不修理。一遇大雨。必難行走。至廣渠門內之路。亦著一併查勘具奏。欽此。遵

旨查勘廣渠門道路。毋庸修理。左安門道路微窪。交街道廳將創挖街道附近所起之土。運往鋪墊。再天橋起至永定門外吊橋一帶道路。應改建石路。以期經久。○又

諭自朝陽門至通州京東大路。曾發錢糧修墊土道。今復壓壞。此道行人既多。且係京城大小官員支領俸

米必由之路。著由朝陽門至通州大道。皆鋪墁石塊。酌量可容二車。兩旁土道亦著修理平整。○又

諭。平治道路。王道所先。是以周禮有野廬合方之職。自四畿達之天下。掌其修治。俾車馬所至。咸蕩平坦易。津梁輻輳。行李通達。無雨雪羈滯之累。邇年以來。廣甯門外。已修石道。通州運糧之處。亦修整高爽。往來行人。頗為便利。今直隸至江南大道。車輪馬迹。踐壓歲久。致通衢竟成溝塹。兩旁之土。高出如谷。一遇雨水。衆流匯歸。積滂難退。行人每苦泥濘。或至守候時日。朕心深為軫念。但此通行大道。久成窪下。勢難培

築增高。而道旁高阜甚多。若於大道相近之處。別開一道。工力似屬易施。其間或有地形斷續。應修建橋梁。或溝塍淤積。應疏濬水道。或所開之徑。有借用民田者。應補給價值。並除錢糧。或繞行之路。有遠隔邨莊旅舍者。應引歸故道。使有頓宿。特遣大員於今年夏秋之交。自京師起程。由良鄉至宿遷大道。一路踏勘。將作何別開新道。詳悉議定。估計工價。繪圖呈覽。

欽此遵

旨查勘直隸山東江南三省道路。自宛平縣長新店至景州劉智廟。應修道路長五萬五百五十丈。修

建橋梁四十八座。自劉智廟至郟城縣紅花埠驛。應修道路長四萬二千十九丈。修建橋梁九十四座。自宿遷桃源至清河縣王家營。應修道路長一萬一千八百十二丈。修建橋梁二十座。並責令該州縣於道旁補栽柳樹。春秋親往查勘奉

旨。工部即行文三省。動正項錢糧。乘此農隙之時。委官作速興工。務於明春雨水前告竣。仍差官往勘。其修過橋梁道路。交該地方官隨時修整。並令新舊交代。永著為例。又題准黔省通滇大路陡窄紆盤。改由

鎮甯州屬黃果樹岔而入別闢新路至普安州屬蒿子卡歸於舊路並修整花局阿藥郎岱等處道路開平斗郎箐打鐵簡古等關石龍那貢烈當趕場豬場等坡務令一式平坦沿途河溝各建大小木橋西林一渡置造渡船安設六驛均歸各該地方官管轄。○八年

諭通州石路及兩旁培土前已降旨交地方官但恐伊等未必實心培墊著工部每季委司官前往查勘並諭地方官知之。○又奏准通州石路及兩旁培墊土道交與地方官管理令沿途保甲居民隨時平

墊車轍。○又奏准直隸山東江南三省道路令各州縣補栽柳樹以庇行旅。○又奏准外城房屋坍塌者多著五城御史會同街道廳驗勘。凡係舊房現修者令照舊地不得侵占。○十年題准盧溝橋琉璃河橋兩邊雁翅毋得搭蓋房屋。有礙行旅。○十一年

諭由京師至江南道路往來行旅繁多。朕於雍正七年特遣大臣官員前往督率地方官修理平治。不惜帑金。成功迅速。又令道旁種樹。以為行人憩息之所。比時河東總督董率河南官種樹茂密。較勝他省。經過

之人皆共見之。凡此道路樹木皆朕降旨交與地方官隨時留心保護者。近聞官吏怠忽日漸廢弛。低窪之處每多積水。橋梁亦漸折陷。車輛難行。道旁所種柳株殘缺未補。且有附近兵民砍伐為薪者。此皆有司漫不經心。而大吏又不稽察訓戒之故。著傳諭該督撫等轉飭有司照舊修理。務令平坦整齊。或遇雨水泥潦。隨損隨修。不得遲緩。其應補柳株之處。按時補種。並令文武官弁禁約兵民。不得任意戕害。僅有不遵將官弁題叅議處。兵民從重治罪。○十二年覆准川省南北兩路驛站北路之觀音碓牛頭山。

劍門關五侯坡南路之金雞嶺飛龍關大關山
小關山大相嶺飛越嶺金釵碓大胡梯小胡梯
等處山路坍塌應動項修整凡遇陡壁臨深之
處建造偏橋增設扶欄○十三年

恩詔各省要路橋梁間有損壞行人勞苦著地方有司
申報各督撫奏明修理○乾隆二年議准

京師朝陽廣甯二門石道交地方官三年一次查
勘如有圯塌報部修理○三年

諭川省遠在西陲道路之難甲於天下其中棧道偏橋
更為險隘每年資藉民力隨時修補未能一勞永逸

行旅艱辛。深可軫念。著四川巡撫會同西安巡撫委官確勘。將應修之處。分別南棧北棧。兩省分任修理。即動該省存公銀。以為工費。工竣之後。交地方官不時稽察。如遇暴雨大水。衝塌過多。仍准詳報。酌動公項修整。俾永遠堅固。以便行人。欽此遵

旨議定。陝省棧道。自鳳翔府寶雞縣起。經漢中府鳳襃城。沔甯。羌。等州縣。南接四川廣元縣界。綿長九百餘里。其咸甯縣棧道。偏路改由庫峪口至舊縣關。鎮安縣舊縣關偏路棧道。改由關西折入西平峪。至舊司川省棧道。自劍州起。至廣元昭

化一帶長四百二十餘里。凡遇山水相逼紆折之處。隨勢開鑿。增廣偏路。偏橋。疊橋。砌路。增設木筏。接渡。懸巖峭壁。大谷深淵。建築短牆。並設木欄保護。○六年題報。棧道工竣。令地方官不時巡察。其存積各項鐵器。存州縣庫內。以為歲修之用。遇地方官新舊交代。造入冊內。以專責成。○十二年奏修

畿輔低窪道路。奉

旨。交地方官隨時辦理。○十五年

恩詔。各省要路橋梁有損壞者。著地方有司申報該督

撫動項修理。

十六年恩詔同。

○十七年議准廣甯朝陽

左安右安永定等五門土道遇有應行修墊者由巡城御史勘報都察院堂官覈明咨部興修以杜冒銷所需銀兩動支大興宛平二縣行當雜稅。又覆准大興縣所屬朝陽門外自定福莊交界起至通州交界石道兩旁土道如雨水稀少隔二三年修墊如遇雨水過多低窪不堪仍隔年修墊。又覆准東南西三城所屬土道俱令隔年修墊一次。○十九年

諭五城街道泥土歲久填積增高行路居人均屬不便

著管理河道溝渠大臣等詳悉查勘。量其修理之費。動支官帑。除去積土。堆置就近城外隙地。此番官辦後。隨時畚除。自易為力。並令該管衙門。酌照從前煤車回空。攜帶沙土之例。善為經理。毋仍壅積。但不得任聽兵役。抑派滋擾。○又

諭京師為萬方輻輳之地。街衢廬舍。理宜整齊周密。以肅觀瞻。乃近來京城內外。多有拆售房屋者。行戶等藉以居奇射利。此陋習也。現在八旗人眾。居住不敷。特發帑金增置。以資棲止。該管大臣。止圖近便。率購舊料。致將已成之屋。輾轉拆蓋。料物必多折耗。是因

增而轉減於生計亦屬無益著工部步軍統領順天府尹五城御史出示嚴行禁止○二十五年奏准修理各門石道牌樓橋座海墁工竣保固三年工部按季派員查勘如有限內損壞者著落承修官照數賠修○二十六年

恩詔各省道路橋梁間有損壞者著地方官查明修理以利行旅○二十七年

諭京城為輦轂重地輪蹄輻輳修治最關緊要近來朝陽廣甯等門普修石道官民均為便利惟德勝門外至清河一帶地勢低窪一遇大雨泥濘車馬往來未

使物價較昂。未必不由於此。著步軍統領衙門選派賢能司員詳加相度。妥協修治。其餘各門修理亦屬年久。或有未能平坦。不便行旅之處。並著查勘奏明酌辦。多興土工。亦所以養窮民也。○二十八年奏准請撥

西巡經費餘息銀一萬兩。交陝西省漢中鳳翔二府分給。南鄭甯羌城固洋縣沔縣褒城鳳縣寶雞鳳翔岐山扶風郿縣。交當商營運。每月一分交息。按季彙解府庫。專供修理棧道工費。責成漢興道。今改陝安道總理其事。凡棧道工程責成各州縣

巡檢典史驛丞按其所管邨莊道里分定經管。遇有傾圯殘缺應行修理者即通報道府飭該州縣確加查勘。如些小殘缺約需工料無多者州縣捐貲修理。如工料在十兩以上者即詳明動撥息銀興修。年終將各州縣動撥修理工程彙造冊結由道覈移藩司轉請奏銷除歲修外所餘息銀遞年積存遇有必應拆換大加修治之年確估奏明動修。二十九年覆准自新莊至土城德勝門至清河一帶新開大道行旅輻輳道旁柳株務令成活大興宛平二縣將栽種

數目報部。都察院步軍統領飭五城三營巡查看守。毋令損傷。○又覆准德勝門外新開土道所栽柳株。順天府飭所屬專差管理。○又覆准阜成門外新開大道。自慈惠寺前起至兩家店一帶。大興縣所種柳株。交都察院飭該城看守。不時巡查。毋致損傷。○三十一年

諭工部。每年題派滿漢街道廳各一員。專司外城街道溝渠行之日久。漸成故事。每逢雨後泥濘。溝道並未稍為修治。則所謂管理街道。徒屬有名無實。現在特發帑金。將京城內外街道溝渠概行修整。專派大臣

董司其事。期於經久。嗣後著工部堂官及步軍統領衙門各揀選賢能司官二員。並令都察院保送御史二員。帶領引見。候朕派出管理。以專責成。仍每年更換一次。又議准正陽門大街石道兩旁土道各定轍路一丈。一切棚攤於新定轍路外。貼近石道開設重車分行兩旁土道。其兩旁土道比石道高者。交溝工處起挑。並開設溝眼。使水歸溝。又奏准移南城副指揮駐永定門外。所遺衙署給予街道廳為辦公之所。三十一年議准京師各門內外臨街旗民房屋。交管理街道御史

等。查出倒塌房間數目。令該戶酌量修補。拆改。或無力修補者。聽其拆賣舊料。仍修砌牆垣。以歸齊整。嗣後臨街坍塌房屋。內城令該戶呈報。步軍統領衙門。外城呈報管理街道衙門。照舊修理。如有木植。甃瓦不全。本人實在無力修補者。令該戶將如何改修之處呈報。委查屬實。准其將餘賸朽爛物料變抵。毋致拆為隙地。至院內房屋。雖未倒塌。欲另行修蓋。或移於他處修蓋者。俱令報明。聽其修蓋。僅將臨街完整房屋。捏稱倒塌。無端拆毀。售賣者。嚴行禁止。○三十

三年奏准。管理街道御史出差。照查旗之例。在一年以內者。交都察院堂官於科道內揀選。暫行委署。○又議准。嗣後遇有坍塌房屋。該戶呈報委員驗勘。實係應行拆改者。照三十二年原議辦理。仍將原拆並修蓋間數記檔。其移改房屋。原係坐落何處。今移何處。並新舊間數。一併確勘。僅有藉稱移蓋改修名色。串通胥役。將拆改房屋私行變賣者。一經查出。該戶照例治罪。委驗官扶同失察。分別叅處。仍令步軍統領街道衙門。將本年拆蓋移改房屋若干間數。於年

終彙案具奏。○三十四年議准。

京師各門內外石道保固三年後每屆三年工部派員查勘一次。如有坍塌者即行奏明估計修補。○三十五年議准外城街道積土交五城御史街道廳曉諭居民無論大街小巷各就住房街面隨時自行剷刨。毋許再有堆積。弁兵鋪甲人等如不實力稽查經該管大臣官員查出將兵役一併究治。至每歲開溝所出穢土悉令載徙下窪處所。毋許存留街面。官弁胥役不得藉端需索。滋擾居民。開竣後該管大臣派員通行

查勘。僅有堆積。致道路復有高低者。將承辦之員照例議處。○三十六年

恩詔。凡遇橋梁道路坍塌。查勘請修。○四十一年

恩詔。各省要路橋梁間有損壞者。查明詳報興修。○又議准。外城偏街小巷溝渠。聽居民自行清釐。大街官溝地面。交街道廳會同五城御史。將所有臨街房基及騎溝礙道地方。秉公逐細清查。造冊存案。日後毀壞時。即令清出還官。此後如有鋪戶人等呈報拆蓋房屋。街道廳親查明確。應清出者。即行清出。無騎溝礙道者。方准興修。○

四十二年奏准正陽門外至天橋一帶大街係南郊大祀經由之地兩邊房屋均宜一律齊整間有不能取直者即騎溝亦無礙如遇毀壞仍照舊基修蓋○四十四年題准四川省新疆等處木索偏橋遇有朽壞木板橋三年拆修一次竹纜索橋一年修補一次○又奏准

盛京商人捐修承德廣甯二縣橋梁道路餘贍銀四千六百九十六兩零交商每月一分二釐生息遇有橋道損壞動用息銀辦理造冊報部覈銷年終將所收息銀數目報部查覈○四十五

年

恩詔與二十六年同。○又議准外城各衚衕巷市房屋遇有坍塌者照依舊址修蓋不得於舊址外稍有侵占。○五十年奏准外城大街高燥處悉令照舊低下處量培土埂高數寸寬一丈輕車行人由中道埂上行重車埂邊左右分行各處小衚衕該管官勤加巡查遇有雨後溝渠坍塌淤塞者即時修補疏通京官鋪戶及會館令其遵例各按門面宅址自行修理貧戶門首令看守柵欄兵丁隨時埽除如有穿牆出穢物於道旁

及堆積作踐者。立即懲治。奉

旨。情民於土道低窪處所。暗掘坑坎。車行陷入泥淖。及令幫同挽曳。復從中索錢漁利。殊屬可惡。著交王大臣會同步軍統領都察院。詳晰妥議具奏。欽此。遵

旨議定。管理街道御史。兼派滿漢各一員。並照巡城之例。統以兩年為滿。方請更換。至管理街道司員。御史及協理之巡城御史。如不認真督辦。致有道路不平。情民索詐等弊。參奏議處。○又議准戶民修造房屋。呈詞街道衙門。初三日批。坊近者限初六日覆。遠者初九日覆。僅實須轉查不

能依限者。亦准該坊申明街道衙門。專文起限。其收呈給照。該管官員務須按照三六九呈期。全行到署。令戶民當堂呈領。毋容胥役經手。致滋弊端。仍將收發日期。每月彙報工部都察院。提督衙門一次。以憑稽覈。至城外邨莊。除石道兩旁建造及修理墳塋。令赴該衙門呈報外。其餘邨莊修造。應令在本管營汛衙門呈報。就近驗明。准修。按季造冊彙送。該衙門存案備查。○又議准。正陽門外至天橋以南一帶石道。交街道官員不時稽查。一切民車。皆令由兩旁土道。

行走至兩旁開設棚攤不許有礙車轍以利通行。並正陽橋兩旁護城河岸及石欄杆不許鋪戶居民侵占。仍嚴禁傾墊渣土以杜弊混。五十一年奏准朝陽門內祿米倉一帶道路計長二百六十餘丈。改建石道以資轉運。五十三年議准臺灣境內各處通衢要路酌寬一丈五尺為度。一律修整以通行旅。五十五年

恩詔各省橋梁道路間有損壞者著令地方官查明修理以利行旅。五十六年奏准管理街道廳員仍令一年為滿。嘉慶四年

恩詔各省道路橋梁間有損壞者著地方官查明修理以利行旅。又奉

恩詔各省要路橋梁及過渡船隻間有損壞妨礙行旅者地方官查明隨時修理。六年

諭向來京城內外遇有修建牆垣房屋等事各該旗民俱係報明步軍統領及街道衙門方准興修原以杜侵占官街之弊現在京城內外因雨勢過大坍塌牆垣房屋甚多自應趕緊修葺以資棲止若必俟報明各該衙門後方准動工未免守候稽時恐啟胥吏需索之端著令各該旗民現修牆垣房屋除於舊址外

另行改建添蓋者。應照舊呈報外。其餘俱聽修築。毋庸呈報。各該衙門。以歸簡便。而示體恤。儻竟有藉端越界。侵占官地者。仍令該衙門查究。○二十二年議准。浙江省烏程縣橫塘塘三洞大橋。為文報往來要路。在商輸景工生息款內。動支修建。○道光元年。奏准。江南省上元縣九龍橋。復成橋年久坍塌。於奏明充公存贖銀兩內。動支工料銀一萬三千五百四十二兩零興修。○又奏准。

盛京輦城內外池溝城濠。並七十二池。應行修完。疏濬。及該將軍衙門屋宇坍塌。損應修者。均照例。

勘估興修其工需銀兩。在查封木植三萬餘件內變價作為間款以濟工用。○又奏准直隸省宛平房山良鄉三縣修墊大道挑挖河身並修理橋座壩岸等工。估需銀兩。在藩庫節年地糧項下動撥。○二年奏准安徽省宿州北關外驛路因黃水衝刷橋梁亦俱坍塌亟須興修所有估需土方工料銀兩。即於水利工程典息銀內動支。○三年奏准直隸省獻縣城北滹沱河臧家橋係七省通衢大路橋座年久朽壞亟需拆卸大修。所有估需工料銀兩。即在藩庫地糧項


下撥給興修。○又議准直隸省滿城縣彭家橋普濟橋陞陽驛邨東邨西橋各一座。在清河道庫河淤地租銀內動撥興修。○四年奏准直隸省天津西沽疊道估需工料銀五萬六千八百四十三兩零。此項工程向係商辦。動用濩課銀兩。現在濩課存項不敷支放。即於徵存應解豫省料價息銀內如數借給。以便開工。○又議准江南省上元縣境內上坊橋一座。年久朽壞。所需銀兩。於司庫存公銀內動給興修。○又奏准直隸省河間縣南八里鋪大橋坍塌。亟宜修建。

所有估需工料銀兩。即於水利生息項下照數動給。○又奏准浙江省仁和縣境內華光大橋年久傾圯。共估需工料銀八千四百六十八兩零。即在耗羨內動給。○五年奏准直隸省清苑縣北關外護城河石橋。暨新安縣東關外木石橋座。年久坍塌。且逾固限。所有估需工料銀兩。俱在清河道庫存河淤地租銀內動撥。○十年奏准直隸省獻縣臧家橋。自道光三年修理以來。已逾七載。近被河水衝折。亟應修整。所有估需工料銀兩。即在地糧項下動撥給發。○十二

年奏准。四川省漢州清白江。有永清石橋一座。上年被水衝毀。該州民人張先詔同姪監生張德孚。捐資承修。共用工料銀一萬六百餘兩。交部議敘。○十四年奏准。直隸省正定縣南關外。有廣濟石橋一座。年久塌卸。亟須重建。以資利涉。共估需工料銀二千二百九十五兩零。即於清河道庫存滹沱河生息銀內。動撥興修。○十五年奏准。直隸省涿州橋壩。為南北通衢。前經山水衝塌淤漫。所有估需工料銀兩。即於司庫地糧內動撥。○又奏准。安徽省靈璧縣新馬橋。

地方係九省通衢。中隔滄河。原建石橋一座。年久坍塌。每遇河水泛漲。漫淹十有餘里。若仍照舊址修復。費煩工鉅。請於黃家渡地方改建。並將驛路營房腰站公館等項。概行移徙。所有估需工料銀一萬五千九百五十八兩零。即在藩庫水利工程典息項下。動給興辦。○咸豐元年奏准。直隸省之雄縣任邱保定文安等縣驛路河隄等工。業經籌款修辦。次第工竣。其任邱縣千里長隄。連年被水汕刷。又連橋十二座。腐朽塌卸。各段疊道。亦多坍塌。瓦濟橋一座。鼓斜鼓裂。

均宜亟加修理現已借項興辦分年攤徵還款



欽定大清會典事例卷九百三十三

工部

橋道

除道

御道種樹

除道○康熙四十年題准京城內墊道交步軍統領城外令大興宛平二縣分理○四十一年題准修橋墊道著動用道庫雜項錢糧報戶部會同本部覈銷○五十五年議准

聖駕行幸沿途修墊銀交本部扈蹕侍郎齎往沿途給發事竣奏銷○五十六年題准修墊營盤大營每座給夫八十名頓營四十名修墊道路每

里日給夫五名。每夫日給銀六分。○乾隆元年諭。時際東作方興。農事伊始。毋得因朕謁

陵經過地方。多覓人夫修墊道路。致妨農業。○又

諭。修理謁

陵道路。著酌定一路修理。毋得屢行改易。以勞吾民。○

六年

諭。進哨經由之路。皆

皇祖所行舊路。朕今年前往。所由道路橋梁。皆著略為修理。俾可行足矣。斷不可妄挾地方田畝。擾累黎民。至沿途所有行宮。如院宇牆垣有倒壞之處。不必令

工部官修理。著勘明交內務府總管修理。○八年奏准修墊道路。每里日給夫五名之外。再加增二名。大營每座八十名。頓營每座四十名。各加倍給夫。○十一年議准喜峯口一帶道路。以山頂分界。南屬薊州。北屬遵化州。自山北至

昭西陵二撥紅椿一帶道路。安設柵欄。歸石門工部經理。○十四年奏准直隸省所屬修墊道路諸費。統於司庫存公耗羨銀內動用報銷。由部委官前往監修之例。一概停止。○十六年奏准

巡幸未經

駐蹕。其大營頓營地基。經嚮導大臣奏明指辦者。皆令報部。准其覈銷。○十七年奏准。直隸省所屬辦差經費。兼於當雜稅銀內動撥。分案陸續咨銷。於每年奏銷案內彙覈題報。○十八年奉旨。嗣後有水之河搭橋。乾河不必搭蓋。○又

諭。朕巡幸經過地方。所有道路橋梁。自應照例辦理。至道旁茶棚一項。隨從官員原無暇憩息。徒供僕隸人等蹂躪作踐。而地方官又多此一番豫備。甚屬無謂。著停止。○又奏准。每次

巡幸供帳什物。均由京中置備。齎往應用。其由地方

官備辦。如大營頓營動用席片木椶等物。亦皆動支公帑辦理。但存一取用名色。即啟將來藉端訛索。濫應冒銷之漸。應全行裁革。嗣後令該管處大臣。先期詳定應用物件數目。由京置備齎往。如閱時既久。必須增補者。呈報總理行營大臣。奏

聞辦理。○又奏准大營盤每座。新修地面給夫一百八十名。舊地九十名。頓營盤每座。新修地面給夫百名。舊地五十名。修墊道路。開荒每里給夫四十名。熟道三十名。○又議准

聖駕謁

陵及

巡幸各處。凡直隸省所屬修墊道路等項報銷部選
賢能司官數員。專司覈算。年終將已銷未銷各
案繕摺奏

聞。又議准直隸省所屬營尖道路地面內有低窪
高坡應行修墊者。俱於差前豫報該督。派令賢
員驗看。將實在應修地名方向。並創墊長寬高
深丈尺。詳細開單具結。由該督查覈咨部。如承
辦官並不豫報該督。派員驗勘。遽行入冊開報。

概不准銷。仍將蒙混開報之員查明叅處。○二十五年題准恭送。

玉牒經由道路橋梁工部行文各地方官豫行修整。於每站歇宿之處相度寬平處所搭蓋綵棚安奉地方員弁帶領兵役周視巡防。○二十六年覆准山西省各屬修墊道路等項銀兩彙案咨部覆准後覈實奏銷。○二十八年奏准每逢

巡幸木蘭經由營尖道路派嚮導處章京一員會同工部查道司員於前期一日前往查看如地方官不以為事一經查出立即叅處。○二十九年

奏准

聖駕謁

陵及

巡幸木蘭等處。經由各州縣道路。有橋座丈尺加長。實係河岸衝寬者。自應准銷。如止係豫防水長。臨時究未發水。應即覈減。舊道內溝坎有水。添搭正橋。非大河橋梁可比。照大河橋梁例。准銷一半。至所添副橋。概行刪除。水車水壩。墊夯夫及運木腳價。道旁井眼。或上屆所無。或較上屆多添者。酌覈刪減。沿途溝坎。填墊秣穡。深六尺。

以上者准銷六尺以下者俱行刪除。○三十年
奏准直隸省各州縣辦差經費數在一千兩以
上。仍循舊例分案陸續咨銷。於每年奏銷案內
彙覈題報。○三十一年奏准山東省各屬恭逢
巡幸修墊營尖道路銀兩。照直隸省例陸續咨銷。完
日彙總題報。○三十四年奏准嗣後辦理差務
凡遇營尖道路內修墊水衝溝窪搭建正副橋
座該督於差前委令道府大員親身確勘開明
長寬高深丈尺做法由該督覈實先行送部存
案其水營地基俱一體查勘報部不得於事後

補送。儻不豫行勘報。遽行入冊開造。概不准銷。

○三十六年

諭。今日至寶稼營登舟。見所設水營外圍席牆。概行暴以黃布。甚屬非是。向來巡幸所經水程營盤。外牆率以葦席為之。足蔽內外。惟江浙兩省。因葦席稀少。代之以布。今乃於葦席之外。復加布襲。且高逾數仞。儼如大牆。其意何取。布足為小民被服所需。豈宜妄為耗費。即如武清等縣。去夏曾經被潦。因加恩從優賑恤。幸而民無菜色。稍為慰懷。若留此布為貧民襦袴之用。資衣被者不知凡幾。顧置有用為無用。使不知

者疑於土木衣文繡。豈朕省方觀民之意。司牧之謂何。曾不知體下情承上德乎。前途有似此者。著即撤去。所有布足。聽民間買用。庶不致成棄物。○又

諭。前於寶稼營登舟。見所備水營外圍席牆。幕以黃布。又添設坐落板房。均為過當。每日駐蹕。閱之輒為不懌。夫水營不過為艤舟一宿而設。朕所御安福艦。大小合宜。且於岸上張設氈廬。尤極寬敞。雖召對多人。亦能容列。朕甚安之。何藉此板屋數楹為憩息乎。且又位置廊軒。增華飾美。心益憎厭。是以所至之地。竟有不登岸寓目者。構此何為。雖一切裝修。皆係舊存。

物料其工作之用。則由大吏等自效惓忱。然朕巡幸所經。供頓儲備。絲毫不欲累及官民。每一水營。准令開銷數千金。俾之承辦寬裕。今乃不知撙節。轉事此無益之耗費。實所不取。昨已諭令將所有物料。於回鑾後即速變售。嗣後或有安設水營。悉遵舊規。不得稍有點綴。致干咎戾。○三十八年奏准。順天府昌平。懷密。西州縣各河浮橋。如有汛期不能保護者。暫將橋座拆卸。一應緊急文報及差務車輛。多用渡船以資來往。○四十三年

諭。向凡巡幸所至。一應經行橋道。俱令報部覈銷。以寓

體恤官民之意。惟盛京一帶止計橋梁。不計道路。未為畫一。非所以廣惠也。所有此次自山海關外至興京往來道路。並著加恩。照關內例報銷。○又奉

旨。盛京水次橋梁有欄杆者。按奉天例報銷。不得照關內之例。無欄杆者。不准報銷。再並非水次搭橋甚多。此項一概不准銷算。○四十五年

諭。朕因東南黎庶望幸情殷。爰舉舊章。五巡江浙。所以省方觀民。勤求治理。清蹕所經各處。舊有行宮。止令埽除潔淨。以供憩宿。毋得踵事增華。致滋糜費。第念直省行館近京數程。屢經駐蹕。即埽埽裱飾。為費無

多。其山東江浙所有行宮。自乙酉南巡至今未經臨
蒞。閒時既久。不免虧舊剝落。地方官修理葺治。俱係
捐廉辦理。在地方大吏養廉豐厚。分年扣捐。以抒忱
悃。尚屬可行。況朕又復加恩賞給庫銀。用示體恤。伊
等辦理。儘足敷用。若更派累閭閻。致滋苛擾。則斷不
可。且非朕念切民依。行慶施惠之意也。恐不肖有司。
或有藉辦差為名。暗中科斂者。一經查出。必將該督
撫等重治其罪。以昭儆戒。其各懷遵朕旨。慎毋自干
嚴譴也。○四十八年奏。奉 恭送

寶經由橋梁道路照恭送

玉牒例工部行文地方官修墊○又

諭此次自山海關以外至興京往來道路並著加恩照
關內之例一律報銷○五十一年

諭朕此次恭謁

西陵巡幸五臺昨經過滿城完縣一帶地方道路凡遇
低窪舊路並無積水處所概行建搭橋座甚屬無謂
橋梁原為行旅而設本非河渠水道不過因地勢窪
下即搭蓋橋座以為平坦飾觀蹕路所臨地形高下
不一於經行本屬利便又何必為此無益之費况現

在並非大雨時行之候。明係地方官借此為開銷地步。殊為非是。著總理行營嚮導處及行在工部於所過地方。將無水有橋處所。逐一查明登記。將來報部時。止准其開銷一半。嗣後儘仍妄行建搭橋座。即概不准銷。以杜浮冒。至每日駐蹕營盤。亦止須計算網城市城環衛地步。以敷周列足矣。無取過寬。此次所築營盤地面。過於寬敞。雖係動項辦理。已覺徒滋糜費。若地方官或因此有所賠墊。則更無謂。況此等地面。即係民田。過事實寬廣。既於耕作有妨。且輕用民力。亦非所以示體恤。朕於一切經費。從不使稍有浮冒。

亦不肯令人賠墊。惟期公私各當。嗣後該督等務須妥協經理。稱朕意焉。○五十二年奏准。順天府昌平州之簡溝。懷柔縣之雁溪七渡。二河。密雲縣之白河等處。每逢

巡幸熱河。倉場衙門。毋庸雇覓民船伺候。遇有必需應用者。隨時酌量豫備。○五十七年

諭。向來蹕路經過地方。搭蓋橋梁。原為河渠水道而設。此次經過直隸地方。道路凡遇地勢低窪。並無積水之處。亦概建橋座。殊屬無謂。嗣後遇有此等無水處所。不准支搭橋座外。所有此次經過地方。無水有橋。

之處。仍著據實報部。並令嚮導處及行在工部查明登記。於報銷時准其開銷一半。以昭覈實而示體恤。

○嘉慶二年

敕旨。工部奏此次巡幸熱河所有沿途橋座查對丈尺多有不符。開單進呈。因思直省辦差官員舊弊。於橋座一項。或因山水長發無常。於原定丈尺外寬為搭蓋。或於無水處所亦搭橋座。藉為開銷地步。以此項之有餘補彼項之不足。此等情形。朕所素知。但所搭橋座。不過於原定丈尺寬搭數丈。何至懷柔密雲灤平三處橋座。輒浮開至五百九十餘丈之多。此非承

辦之員。因朕不察。日甚一日。大作浮冒乎。本應徹底根究。示儆。但朕向來辦事。不為己甚。不值因此將直隸大小承辦官員。普行懲究。是以仍交該督查辦。務須秉公確查。據實參奏。加倍罰賠。○二十年

諭。那彥成奏上年薊州白澗迤東地方。並遵化州境內道路。回鑾時並未經行。其道路已經修墊。可否將御道兩旁地畝。應徵錢糧一體蠲免。十分之三等語。向來巡幸。恩免錢糧。專指蹕路經過之地。上年由白澗回鑾。迤東一帶。並非蹕路所經。其錢糧自不應一體蠲免。該地方官漫無區別。辦理錯誤。彼時那彥成尚

未到任。所有此項錢糧。著該督查明承辦之員。照數分賠。○二十三年

諭。御史卿祖培奏。修辦御道。請專任承辦之官。毋庸虛設多員一摺。所奏是。朕每於春秋園次。面諭直隸總督等。毋許多派辦道官員。以省擾累。乃該省積習相沿。派委之員。逐年增多。浮費日加。勢所不免。嗣後直隸修辦御道。著專責成承辦之員。如式修墊。其督辦幫辦等官。概行裁汰。臨期再派隨園之道府總司查察。毋許藉端滋擾。如朕經臨時。御道旁見有委員雜沓。定將該督等懲處不貸。○二十四年

諭方受疇奏司庫借支橋道經費懇恩賞撥還款一摺。直隸省承辦差務各屬請領橋道經費向係在於當雜等稅及文職空曠帶辦款內動支。節年以來因不敷支用。屢在司庫借動。據該督查明。歷任藩司共借款未歸銀二十四萬五千一百餘兩。著即在長蘆鹽斤加價項下撥給二十四萬五千兩交司庫按款清還。以杜牽混。至每年朕恭謁

西陵及巡幸木蘭。皆係歲舉常儀。嗣後該地方官承辦橋道支用經費。止准在於本款動支。不得借用別款。如有用項實在增多之處。俱各專案奏明。不得歸入

此項橋道經費數內。以免輻輳。○道光九年

諭。奕顥等奏請酌借辦公銀兩一摺。本年盛京辦理差務。各廳州縣應修橋梁道路。及豫備行營器具等項。內有定例不准開修。而例價不敷。歷屆俱請酌借。淺餘銀兩辦理。惟現在此項並無徵存。著准其在盛京戶部庫存俸餉贏餘項下。賞借銀三萬兩。以資備辦。仍由各廳州縣分作五年扣繳歸款。○又

諭。奕顥等奏請酌借銀兩辦理差務一摺。盛京差務。前經賞借銀三萬兩。茲據該將軍等查明各廳州縣承辦營盤橋道。尚不敷用。著照所請。准其於盛京戶部

庫貯俸餉贏餘項下借支銀八萬兩。該將軍等詳查承辦各廳州縣差務之緩急。及應領銀數之多寡。酌量借給。俟報銷時全行扣繳歸款。仍時加督察。務期覈實。○光緒四年

諭御史田翰墀奏。明年恭修御道。請飭嚴禁苛派一摺。前經降旨。明年恭奉

穆宗毅皇帝

孝哲毅皇后梓宮。由隆福寺等處行宮至

惠陵。永遠奉安。及

神牌還京。均著毋庸另備御道。原以體恤民艱。茲據該

御史奏稱。向來辦差。往往有州縣苛派胥吏需索等情。尚復成何事體。現在災歉頻仍。民生困苦。尤應嚴行申禁。所有明年恭修御道。著直隸總督嚴飭所屬。按照災歉輕重分別酌派。不准苛斂浮收。如查有州縣及胥吏侵吞情事。即著嚴叅懲辦。毋稍寬縱。○六年奏准。各州縣請銷橋道銀數。按照道光年間每次准銷成案。分析覈明。酌中定議。並行文直隸總督。順天府府尹。轉飭各州縣。按照單開數目。依限造報。不得加過三成。儻有浮多。即照此次所定數目刪減。以省繁牘。而昭畫一。

一。承辦恭送

聖容

實錄

玉牒

冊

寶差道准銷銀數。大興宛平兩縣一千兩。通州五千兩。
三河縣五千兩。薊州六千一百兩。豐潤縣六千
九百兩。玉田縣七千九百兩。盧龍縣八千四百
兩。灤州七千四百兩。遵安縣六千六百兩。撫甯
縣九千兩。臨榆縣六千五百兩。一恭辦

妃

嬪金棺彩棺奉移差道准銷銀數。大興縣一千二百兩。宛平縣四千三百兩。通州二千二百兩。三河縣一千七百兩。薊州二千八百兩。遵化州三千三百兩。良鄉縣二千七百兩。房山縣四千四百兩。涿州一千二百兩。涑水縣二千八百兩。易州二千一百兩。○又奏准。恭送

實錄

聖訓

玉牒

冊

寶至

盛京尊藏例由順天直隸奉天沿途州縣先期修治道路橋梁並搭蓋絲棚事竣造具清冊報部嗣後定限二年冊報到部如有遲逾不准開銷○又奏准

妃

嬪奉移道差亦定限二年報銷

御道種樹○雍正二年奉

旨自西直門德勝門至暢春園沿途皆著種柳公道亦著栽種動用錢糧栽完樹木令人看守欽此遵

旨議定。令西北二城。大興宛平二縣各該地方。分爲四段看守。○三年奏准。種樹令保活三年。如三年內有枯焦者。原種樹官補種。如各該地方官不敬謹看守。以致樹木被人折壞。牲畜嚙傷。及偷盜者。並令各該地方官補種。○四年奏准。西直門至暢春園栽柳九千二百九十七株。德勝門至孃孃廟栽柳三千二百三十四株。○六年

諭。沿途所植樹木。已閱四五年矣。看來不甚茂盛。此皆草率所致。圓明園正陽門前樹木。係敬謹種植。甚覺整齊茂盛。向例道旁樹木有乾枯者。令補種。近日竟

不補種。朕所經由之路尚且如此。則他處僻路可知。著內務府工部堂官五城官員查奏。欽此。遵

旨議定。西直門德勝門至

暢春園一帶。沿途柳樹枯焦損失。著落原種樹及看守各官。限一月內照數補栽。嗣後令五日澆灌一次。如逾限不完。指名題參。其應賠種樹官內有不能賠補者。著落本部堂官賠種。種後西直門外石路交西城。西直門外西道交大興縣。西直門外東道交宛平縣。德勝門外一帶交北城各令人看守。工部仍會同內務府步軍統領

順天府尹巡查。遇有枯焦損失。即令補種。違者指叅。○又奏准。種樹價值。每株給銀一錢。○八年。議准。栽樹高一丈二尺。徑二寸五分。栽深二尺。清明栽完。五日澆灌一次。根下用棗茨圍護。○十年。

諭。圓明園石路兩旁樹木。應加謹培植。曾屢降諭旨。何以種植年久。仍然細小。皆由所司疏忽所致。此項樹木。或係內務府。或係工部種植之處。著查奏。欽此。遵旨議定。查勘清楚。寺至。

圓明園柳樹。係內務府種植。西直門至清梵寺石。

道兩旁並各岔道柳樹。係工部委官承種。嗣後
應補樹株。不准各官自行補種。一面勒追樹價。
一面別行委官栽種。

[illegible]

欽定大清會典事例卷九百三十四

工部

橋道

柵欄

溝道

柵欄。順治元年定。

京師內外大小衢巷。設立護門柵欄。有作踐損壞者。交刑部治罪。○雍正七年覆准。外城柵欄共四百四十座。均責令兵丁看守。以時啟閉。○乾隆四年覆准。外城柵欄遇有損壞。由三營將弁呈報步軍統領。步軍統領移咨到部。令街道廳查勘估報。委官修理。○九年覆准。內城柵欄嚴

禁該管旗分科派捐修。應修造者。照外城例。令該管旗員呈報步軍統領。咨部動帑修理。○十五年覆准。外城柵欄四百四十座。內有兩旁房屋倒壞。無從依靠。毋庸修理者二十九座。○十八年覆准。內城柵欄共千一百九十九座。

皇城内柵欄一百十有六座。○二十三年奏准。修理外城坊巷柵欄。並責成五城三營管轄。載入交代。不得任其傾圮。如三年限內傾壞者。查明咨部。令原辦官賠修。限外遇有些小損壞。即令五城隨時設法整理。至期屆十年。或須大加修

葺五城三營會同確勘奏明。咨部修理。○二十四年。勘定外城柵欄四百十一座。內有小巷柵欄。中間或係空地。或有支巷。輾轉相通。雖有柵欄。無裨實用。毋庸修葺者。一百七十九座。○二十九年。奏准。外城各街道衙門。設有柵欄。至為嚴密。交五城不時稽查。務令以時啟閉。柵頂仍釘木板。書寫街道衙門名色。○又三海關南北水門。並關北之九門水口九牐。設立高大柵欄。夏秋起柵。冬春封鎖。以資防範。○三十四年。奏外城柵欄。交五城御史督率坊官不時查勘。毋

任車馬居民任意作踐。如有零星傷損。即令就近商民自行黏修。其堆撥房交三營將備隨時查看。動用營中公項黏補。常令完整。仍交街道廳年年按季查驗。如不隨時修整。以致殘損過甚者。即行叅奏奉

旨。此項街道柵欄。著都察院會同步軍統領衙門。每年將有無修理及是否完整之處。於歲底查明具奏。咸豐二年奏准。五城柵欄共二百八十九座。今五城呈報黏補完整之柵欄二百三十一座半。難以黏補之柵欄五十七座半。除移咨工部照

例辦理外。至堆撥房三百二間。板棚八間。除本年應修房間。業經修補完整外。尚有應行修理之處。俟明歲再行查報。

溝道。○順治元年定。令街道廳管理。

京師內外溝渠。以時疏濬。若有旗民人等淤塞溝道者。送刑治罪。○康熙四十二年奉

旨。京師內外溝道。著步軍統領監理。○雍正四年奏准。京師內外大小溝濠。內城交步軍統領。分委八旗步軍協尉。外城交五城街道廳。分委司坊各官。凡應行創挖之處。丈量確估。酌動正項錢糧。於

次年興工。○五年議准。創挖

京師內外大小溝濠。例應募夫。內城照步軍修官
工之例。每夫日給制錢六十文。外城照奉宸苑
創挖內外河工之例。每夫日給制錢八十文。由
部給發。疏濬

紫禁城內各處水溝。每創蓋石四十塊。用匠一工。
○七年奏准。自何家莊至左安門水關明溝。每
年淤塞。不能暢流。交街道廳五城司坊官。將何
家莊以下明溝千二百餘丈。開至面闊八尺。深
五尺。直抵水關。每年濬淤。挖淺。不使壅塞。○又

覆准。內城過街溝道。令司坊官雇夫。創窰。外城溝道。著街道廳。令居民自行創窰。禁止溝頭包攬。毋得濫派。○八年議定。創窰過街溝渠。以現所窰之土。折算。見方五尺。給夫一名。○乾隆七年

諭。京城內外水道。甚有關繫。年來但值雨水稍驟。街道便至積水。消洩遲緩。此水道淤墊之故也。向來城內原有泡子河等水。匱數處。以資容納。而城外各護城河道。原以疏達衆流。使不停蓄。今日久未經修濬。皆多淤墊。而街道溝渠。亦多阻塞。以致偶逢霖雨。便不

暢流。此亦應及時籌畫者。著戶部工部尚書步軍統領帶同欽天監官逐一相度。其應如何疏濬之處。詳議請旨。欽此。遵。

旨議定查勘

京師內外護城河。並城內各河。及青龍橋至高梁橋一帶河道。應按舊址疏濬。至於衆水經由各插口。及蓄水四庫。泡子河。太平湖等處。應以次疏濬。城內象房橋。大石橋。並朝陽門等處。露明溝渠。應行估修。城外天橋。東西。及牛街。轎子街。衙等處板溝。應改砌甃溝。九門大街溝渠甚多。

應詳細註冊。分年修理。小街溝渠。照舊例開濬。倍加深通。至各倉水道。並各部院洩水溝渠。應一併疏濬。○十六年奉

旨。京城內外一切水道間段淤塞處所。專交工部辦理。未必妥協。乾隆七年修濬京城溝洫橋道。雖陸續竣工。但從前修濬者。今又不無淤積。而欲使積潦通流。必先由河道疏暢。是以今年特派人員管理河道。隨時指示。已有成效。此案仍著詳晰相度。動項興修。嗣後隨時留心經理。毋令填壅淤塞。○又奏准。京城內外溝渠。每年開溝時。派工部步軍統領衙門司

員及外城街道廳詳細查看。如有淤塞。飭地方官弁立即設法疏通。○十七年奏准。京城內外一應河道溝渠事務。照

內廷地面派總管大臣直年之例。每屆年終。於工部奉宸苑並

欽派查看河道大臣內各派大臣一員。步軍統領衙門步軍統領翼尉內亦派一員。於春間開溝時。率領司員照例查看。務使潔淨深通。秋間雨水過後。親往稽查。一應河道溝渠。如有應修者。該處報明。直年大臣查看。如係零星黏補疏濬者。

即交工部修整。物料銀至二百兩以上。工價錢至五十千以上者。直年大臣奏明。交部辦理。其直年大臣一年期滿。由工部開列各該處大臣職名。奏請更替。如前任有辦理草率之處。接任大臣據實叅奏。○十八年奏准。護城河及雷牖口等處溝濠疏濬事宜。交步軍統領衙門辦理。○又奏准。嗣後外城溝道有應行創挖者。令該處司坊官呈報步軍統領衙門。一併辦理。○二十七年奏准。東四牌樓北錢糧衙門暗溝。按舊基成砌甃溝一道。以資宣洩。○又奉

旨。工部議覆御史條奏廣開溝渠以資蓄洩事宜一摺。所辦尚未周悉。自古力役一項。載在方策。本為捍衛民生而設。則供官正所以自為。並非徵求無藝也。如捐內所稱富者計畝出夫。貧者出力餬口。一切並責之閭閻。微特小民久樂昇平。素不識公徇之令。設使不肖吏胥高下其手。苛派賄脫。何所不有。轉非因利利民之本意。自宜分析籌量。如其地與民田民舍切近。工程又屬細微。民間願出己力者。聽其自行疏築。不必繩以官法。若其工非旦夕可既。而民力更難全任。則官為酌助口食之資。庶民不艱而事易集。公私

實為兩得。是在封疆大吏飭屬善為之耳。現在京城內外。道途低窪。已降旨特派大臣會同步軍統領衙門辦理。此案南城外應修溝渠道路。並非五城御史等所能任。並著工部會同步軍統領衙門。悉心確勘妥辦。○又奏准。

西安門內甬路南邊於

福華門牆外。自西至東。接連舊溝。添砌甃溝一道。使南邊一帶雨水。俱由此溝直達中海。至甬路北邊。

天慶宮前以南至官草欄子。改砌甃溝一道。接至

南口外舊溝。使水流入大街。又珍珠境巷口起。接連舊溝。東至。

陽澤門外。添砌甃溝一道。使甬路北邊一帶雨水。俱由此溝歸入北海。○三十一年議准。外城街巷溝渠。向未動帑修濬者。酌量改修。以資宣洩。此外小巷各溝。仍令街道廳飭五城該管官董率居民鋪戶。遇有坍塌者。即行修整。務使接連大溝。一律通順。○又

諭。京城內外河道溝渠。前經動帑興工。以資濬治。迄今有年。物料或漸朽敝。亦因估辦之初。未能覈實經理。

所致。是以每歲仍事補苴。難以經久完善。今據該管大臣等議。覆御史請修街道溝渠條奏。估需銀十七萬餘兩。此項工程。關係緊要。原不惜多發帑金。為永遠利民之舉。然非悉心籌辦。實用實銷。徒費多帑。於事終為無補。現在估料大修。非從前隨時修治者可比。惟在董辦大臣稽覈精詳。毋使工程稍有偷漏。庶從此徑途平坦。溝道宣通。足垂悠久。該管大臣實力興修。其應需分辦人員。不必泥於成例。僅在工部司員中採擇。著於各部院衙門遴選明幹司官。奏派委用。令其分段承修。妥協辦理。以專責成。務期帑不虛

糜工歸實用。事竣當派大臣覆勘。儻工程仍前草率。一經查出。或朕別有所聞。不惟該管大臣及承辦司員咎無可辭。特行添派大臣責任較重。更難寬貸也。

○又奉

旨。京城河道溝渠。已降旨撥帑興修。所有應給匠役工食等項。若隨時給發錢文。尤為便益。現在戶工二部局存鼓鑄卯錢甚多。著總理工程處酌量應行需用之數。按照時價支領給發。俾工作人等。既可省以銀易錢之煩。而市肆益得永遠流通。於工程民用。均為有裨。○三十二年奏准。外城修竣溝工。仍令該管大

臣責成原辦監督加謹保固。街道廳暨五城御史加意照管。每年春閒開溝時。該御史等督率鋪戶居民。照內城淘溝例。各將門面溝渠逐一淘挖。務使戶戶通聯。一律深通。毋致損壞。甄石嚴禁胥役人等藉端需索。淘淨後。該御史等奏請

欽派管理河道溝渠大臣一二員查勘。如有虛應故事。致溝身淤塞。甄石損壞者。即行叅奏。其蓋溝石塊。查勘後方准鋪墊。三十三年奏准。歲修溝工。如係零星工作。由直年河道溝渠處逐案

開明丈尺做法。估計錢糧各部。在節慎庫支發。彙入月摺具奏。如所用物料銀二百兩以上。工價錢五十串以上者。由該處估計。奏明各領工竣造冊奏銷。○三十四年奏准。外城官溝。每年春初即行查報。速為覈算給項。與民溝同時興舉。將淤泥淘淨。以資宣洩。內城官溝同。○三十九年議准。外城每年淘挖溝渠完竣。請派大臣覆勘之例。即行停止。嗣後官溝淘竣。由五城街道官報明河道溝渠大臣。各派妥幹司員一人。會同五城街道等官。剋期查勘掩蓋。定限自二

月初開凍後為始。至三月底止。一律完竣。如有稽遲逾限。溝夫需索等弊。經委員等查出。據實稟報。經該管大臣訪出。將委員一併叅究。○五十年議准。嗣後每年外城淘挖溝渠。蓋溝時。將大小各街道酌留溝眼處所。詳細註冊。令該管官員率領副指揮吏目等隨時稽查。如有居民鋪戶人等私行填塞者。嚴行懲治。○五十二年奏准。內城地面廣大。溝洫繁多。支分派別。若仍照舊黏修。未免顧此失彼。應派大臣通行查勘。先將護城河及出水之處抄平取溜。再將各大

街兩旁大溝及各巷小溝。丈量通共若干丈尺。估計做法錢糧。奏明交直年大臣分年辦理。以免淤塞停滯之虞。○又奏准。宣武門西象房橋。迤東化石橋。正陽門東玉河橋。崇文門東大石橋。朝陽門南東直門南等處出水關。並安定門外出水溝。及護城河底。均應抄平對溜。使水暢流。以資宣洩。並將內城大溝三萬五百三十三丈。除溝幫整齊毋庸修理者一萬三千餘丈。幫輒破碎。鼓裂坍塌。舊溝斷續不能通流。溝形過於曲折。水溜不能通暢。應拆修接修展修者。一

萬七千四百餘丈。及隨溝小平橋等工。交直年大臣按例估計。分年辦理。護城河淤。交步軍統領衙門撥派步軍開挖。○又奏准。內城小巷各溝。九萬八千一百餘丈。除舊溝整齊。並歷年歲修。及地勢較窪。向係水自街面明流。毋庸修理者。六萬八千五百餘丈。其餘應修小巷溝渠。二萬九千六百餘丈。並將土明溝應行剷挖者。交直年大臣一體按年修理。○五十七年議准。淘挖。

紫禁城溝渠。改歸內務府派員經管。專司其事。所

用夫價料物銀錢。交內務府大臣詳晰酌覈。照例辦理。○嘉慶六年

諭京師連日雨勢甚大。圓明園宮門內外。頓有積水。自因水道下游淤塞所致。因命步軍統領派出兵丁。將附近舊有旱河壅滯之處。迅速開挖。積水立時消退。此處旱河。自乾隆三十六年以後。至今總未疏濬。漸致淤塞。蓋緣數十年來淤墊日增。驟雨連朝。水無去路。而一經挑濬。即時消涸。可見疏治之功。宜亟講也。因思京城內外溝渠河道。每年雖循例修濬。並派大員管理。但恐奉行日久。有名無實。未能一律深通。著

該管大臣將一切溝渠河道通行查勘。擇其緊要之處。隨時酌量疏通。俾積水不致停留。以奠民居而利行旅。○十四年

諭長麟等奏請修溝渠泊岸等工一摺。京城修理溝渠。向來承辦之員。多不認真經理。甚或支領工料錢糧。從中侵扣。以至渠道愈修愈壞。於宣洩全無實裨。此次請修溝渠泊岸各工。用帑至三萬八千兩。務須遴派妥員覈實興修。工歸實用。長麟等四人並不時輪流親往查驗。如監督等官有私分成數。並偷工減料情弊。即據實嚴叅治罪。若該大臣等不認真稽覈。將

來工竣時有辦理草率之處。被人糾劾。定將該大臣等一併懲處不貸。○二十年

諭御史德莊奏請實力疏修街道溝渠一摺。京城河道溝渠。每年動用歲修銀兩。開挖疏通。管理之員。自應實心督辦。不使稍有阻塞。近來淤積日甚。溝水不能暢流。每遇大雨時行。多有積潦難行之處。御史等疊次奏言。自係該管官因循疏懈。不能如法疏濬所致。嗣後著管理河道溝渠大臣。及該管各衙門督飭所屬實力挑挖。認真查驗。務令水道宣通。毋得草率從事。○道光十七年

諭給事中況澄奏都城街道不平。請認真修理一摺。著管理河道溝渠大臣。工部步軍統領督理街道各衙門會同妥議章程具奏。欽此。遵

旨議定。交河道溝渠大臣。俟明歲春融。派員詳細踏勘。擇其情形重者。入於本年急修。低窪之處。亦須覓土運墊。並遴派妥員。募商妥實修理。認真稽查。儻有偷減剋扣。及溝夫勒索市廛情事。一經查出。即將承辦之員參辦。其每年淘挖之時。由該管衙門督飭旗坊認真淘挖潔淨。務使溝渠一律深通。由查驗各員認真稽查。如查有草率

從事將兵役立予懲處。仍責令重復淘挖。方准墊蓋。至石道兩旁。及各大街開設棚攤。城內向係步軍衙門所管。城外向係街道衙門所轄。應各就所管地面。詳細稽查。如有侵占官街列肆貿易之處。即押令挪移收窄。不准有礙轍道。如胥役藉端滋擾。或得賄包庇。及有將公地據為私界之事。從重辦理外。仍飭九門內外各管地面之員。將並無棚攤侵占官街之處。每年結報各該管衙門一次。以憑稽覈。其街道不平處所。城內應由步軍統領衙門。督令翼尉等飭派步

甲平墊。城外應由管理街道衙門嚴飭五城坊官差派鋪頭坊役修理。務使道途一律平坦。○光緒九年奏准。河道溝渠等工。光緒六年以前均係量工酌費。每年或用銀一萬餘兩。至數萬兩不等。自戶部奏定新章。每年咨報各工。因限於銀數。往往顧此失彼。勢不得不分別停辦。積壓既久。情形愈重。經費愈因之不敷。查近年辦理河道溝渠案內。自光緒六年起。至九年止。經該管大臣力求撙節。統計用過實銀五萬四千七百十九兩零。按照戶部奏定每年一萬五千

之數覈計。應共餘銀五千二百八十兩零。即將
此項存庫。積有鉅數。專備挑挖城河。培墊城根。
以及城內河道溝渠另案要工。以後即照此次
奏定章程辦理。常年工程不得動用。